

喙

鳴

文

集

喙鳴文集卷十七目錄

墓表

泰州知州累贈尚書朱公墓表

常心吾父墓表

丁勺源父墓表

孫端峰墓表

神道碑

崔後渠神道碑

趙麟陽神道碑

王對南神道碑

劉晉川神道碑

馮琢菴神道碑

蹇文塘神道碑

邵越湖神道碑

馮芹泉神道碑

李于田父女神道碑

南陽谷墓碑

黃雲浦墓碑

劉晉川祖墓碑

汪雷峰墓碑

倪處士暨配節婦徐氏合葬碣

喙鳴文集卷十七

四明 沈一貫肩吾 著

墓表

泰州知州累贈資政大夫禮部尚書無翰林
院學士朱公墓表

朱公諱公節字允中家越之東武山其先自朱尉
里徙有尚主者故稱尉至省元仲英徙郡城五傳
為竹庄居士廷瓚能詩隱君子娶徐夫人生公公
生而凝異成童日誦數千言居士早世而公已

聘陸處士女家貧一第二妹幼或勸之遂娶如俗儀公不肯曰喪婚不順也既免喪始受室補弟子員辛卯薦於鄉連試春官不第聚徒講學為易專門師弟子多遂最知名者沈君東高君鶴皆發解甲科為諫議云介介自持未嘗跡郡邑郡伯宛溪梅公顧見之先禮於其廬所相與厚善者陳山人鶴蕭承務勉沈叅軍鍊柳明府文結社於息柯亭修古行業癸丑之北也謁選得彭澤令奉母夫人養焉邑故好許寬則玩急則逸山谷間公務以誠

信感移不率始寘之法時倭犯江淮間楚中震動
公出贖鍰繕城又以小孤山為江右第一關請移
守備於其所造船置械峙糧練兵境賴以無恐江
右稱多才而彭澤不逮公輯書院而躬稽其程飲
食之士類以起嘗大火隨而拜之輒減為文告城
隍曰吏貪污不職令之罪也神其殛我若凶喪火
神安所逃責令與神約各脩乃政無爽豪有持吏
短長逋稅兼并民者公嘆曰吾安能置豺狼問狐
鼠哉卒寘之法而怨乃醞釀矣丁巳擢知泰州泰

本腴州自中倭而主者率浮蠹與奸市故國逋益多公既勞來之而禁一切科歛與民更始民猶有私獻者閉閣自撾曰吾以信待民而民不信哉於是民浸傳語無敢干以私開府以擊豪為政揚之屬械繫三百餘人而泰亦數十人大都景嚮公以去就爭之卒得讞 三殿之役徵文砥於徐而泰當供百民譙竄公發鍰及俸餘佐之吏白入覲有際故資之鍰虛此當柰何公曰吾未嘗妄取何妄與也無念我匱矣泰有鹽塲十而河淤為䟽老東

河達於揚泰壙地百餘里苦旱溢令民每百畝濬
十畝為渠又相地為演武場習民兵儲戰具脩城
垣移兵於周家堡守其隘以備倭居歲餘使者遞
舉之而彭澤之怨起報罷初公去彭澤彭澤人以
陶狄二公共祠公狄公者梁公也亦彭澤令其活
揚州數百人數百人者欲祠公公不許比去泰人
祠之公既歸日奉扳輿為歡出則與社友咏觴繹
舊聞以課子扁其室為悠然居而盡畀其父產于
弟曰予兄弟幼同苦猶一人也癸亥母夫人卒哀

毀有加謂越無喪禮乃定制以齋素非在五服數
者不飯令子孫守此於是冒風寒為毋襄而甲子
三月卒三子應萬曆甲戌進士授刑部主事廣隆
慶戊辰進士今禮部尚書廈縣諸生五孫敬循敬
脩敬復敬德敬仁蓋曆於祖塋之次者二十有八
年為萬曆辛卯而始克葬于王字山沈一貫曰余
童時誦公所著策約博雅君子後得其東武山人
集讀之瀟瀟塵外人乎生平以彭澤自憊不媿矣
一貫既三試試吉士為史官供講讀三十餘年與

大宗伯俱而伯子之第也復相周旋於京師惜中
道夭大宗伯玉潤金相宗廟之瑚璉旦晚躋台鼎
運斗樞勲名光越絕公所不盡用者當在茲也誰
謂公終彭澤令哉

贈徵仕郎刑科給事中常三吾墓表

大中丞常公開府於我淞屬閩宇有戒心飭旄厲
鉞而加之以共蓋 天子任臣哉比以于宗伯郭
太史志狀來請表其大人墓嗟夫隕祥迎祉其先
罔弗自明德始贈公諱自省字希曾學者稱三吾

先生五世祖得春從鳳陽徙武昌是生旺旺生忠
忠生贊贊生慶慶選貢為沔令而有三子仲曰繼
繼娶洪雅令賈公銓女而生公有異姿沔公嘗膝
而授之書輒琅琅成誦屬之對亦驚人語沔公大
喜曰是子旦晚絕影馳矣吾何容容作五斗米吏
哉遽解綬歸無何聲果噪督學使者喬祓裊張山
陰劉內江皆當世人倫宗而遞寵接公謂常生非
常生也諸生上者治家法明經已矣搜述紹古相
傳笑為繆迂又直假毫牘奏技無庸聲韻為而方

言嚨嚨繆訛相師以馱咻耳公謂此儒者恥也而
吾力足以兼古文識奇字乃依字母作歌予童子
誦使之以聲逆詩詩諧韻韻索字四聲七音六書
八體曲暢而既也制義之暇好作詩詩倣陶韋不
繩削而雋其業若此武昌有勲帥填撫引體尊而
其尤橫生有益而過其門者執之諸生隨而大譁
帥恚疏諸生若而人而誣公為之倡以移中丞公
實不預也然舊曰帥曲固願除諸生恥安能首鼠
此禿翁於是詣學使班班言帥實噪譁諸生無罪

學使計不可折試之文文瀚淳挾風雲學使大偉
之立白中丞釋諸生而郡倅李公者因義公掃舍
延為諸子師頃之有以百金求間于公公曰夫李
公義我而吾翻為不義不可亟去毋汙我公以是
謂諸侯門不可遊遂謝歸而方伯湯公之幣又至
終不就夫士隱約難為庶而稍自愛者烏能緩急
人矧難不由我自直非過有如公自直則諸生且
訕是我阱諸生而今虎益驕故舍曰不預而代諸
生取予又振然不膩推此志也肯章皇緯繡上負

其君而下愧遺其寮汶汶銷聲我惜也淪跡埋甕
終不偶於有司而短於三十九也公殞之日中丞
已見頭角矣慰其母曰有孫在兒不死廼今果然
公懸弧於癸未撤瑟於辛酉終始嘉靖間而中丞
第甲戌理南昌給事刑科兩拜命贈公如其官勲
名未艾公亦未艾哉語曰基廣則牖厚神澄則膚
榮土沃則實繁淵廻則魚歸自然之恒理非適符
之偶數也

贈文林郎福建漳州府推官崇祀鄉賢丁少

溪墓表

豫章之丁自濟南遷五代時廐將映避地於是四
世迪功郎仕楫生文質遷五溪質生銑學于伊洛
三舉禮部稱夔天先生語在國史子孫歷宋元德
業科第武相接也十九世南溪少司馬以忠當嘉
靖間著績留都配余泚人正德戊寅生公公諱運
字易昇別號少溪少不好弄長而能文補邑弟子
員蘇舜澤司馬蔡可泉司徒先後督學咸題為蘊
璞七試秋闈兩中乙榜終弗偶癸亥司馬乞身公

遂棄業一意庭闈之事滌滌舞斑不得已有游雖
經宿不能寐謂人子不可不知醫而異於岐黃司
馬公嘗疾公不解帶不交睫者兩月一飲食藥餌
必親嘗而進扶左扶右而敬抑搔之一夕數十起
至骨立猶自力而司馬公竟瘳司馬公瘳而公幾
不勝視其弟某甚愛自幼時與群兒戲弟忽病群
兒眴走而公獨抱持求藥已之若老成人中尤相
勉以樹立曰成司馬公之志弟素豪不脩小節公
陰為之補遺無貶其名故司馬公絕內顧憂而公

卒之日弟親為文累萬言祭之讀罷痛厥誠感之也公既為家督代司馬公主喪三十年宗人散處無慮數千指而一視公即素驕不法者無敢懟公性廉不以錙銖自污不喜諧謔言不及紛華常面折人過人初弗堪終帖帖雖僕夫販子亦謂丁長者不喜佛觀緇黃輒唾不畏鬼嘗讀書僧舍有物魔其僕公移其卧於前而書一正字於其掌竟不來有大盜兩入其室得公公不改其度一曉譬之盜服去一缺望火其廬去公形求之皆得而筠州

人劉某者為盜所連懼夜以金叩門公笑麾之曰
玉石自辨子何乃爾卒直其事無所受筠人義之
於是梅林胡公開府吳越辟公不就王文成以良
知之說傾天下江右尤盛公造其閭而晚好薛文
清公為人魁梧奇偉聲如洪鐘少病自五十來患
寒率未秋不起時司馬公及余泚人尚在以養不
終為恨而人謂公無憾年五十有四配封太孺人
車塘鄒公廷器女所生長此周以司馬公任國子
生未官卒次此呂公未亡一歲時庚午舉鄉試後

七年丁丑成進士理漳州擢御史今為楚叅知諸
孫立本立命立人皆諸生立會立正立兩立叅立
悟皆幼公以叅知初考贈文林郎福建漳州府推
官又十年壬辰郡邑諸生千五百人言於督學崇
祀南昌學鄉賢祠次於司馬公沈某曰王氏之學
要使人復其本心而學者失之丁贈公獨悟其真
謂心無事勿令空有事勿令亂故其于錢穀甲兵
綜理具周而四應不滯可謂憬然而獨信不然王
薛之懸久矣孰能一之夫不空不亂贈公亦救學

之弊云余以為人當空我不空物而後動靜皆得其理乃稱不亂仲子來防海雉蓄遠而出之以和聞少時卞急公每舉呂伯恭語勗之變化氣質吾表而出之使後之人知丁氏甕天先生司馬公後云

孫端峰暨配墓表

孫之先唐有三司使招討大將軍岳由睦州遷餘姚之梅川宋有燭湖先生應時以理學從祀學宮元有山陰教諭原彛拒偽吳張氏命明興四傳而

有忠烈公燧忠烈公子三都督堪尚寶墀宗伯陞
世稱伯仲季三泉先生尚寶子四季為公名鏊字
又器別號端峰主人通博士家言纂晉唐法書補
邑諸生改郡諸生齒大學時宗伯公為大司成公
以猶子群諸胄謹守尺寸後屢試屢詘而諸兄弟
遞取捷乃去而讀先秦兩漢書為古文詞東南中
倭又去而論兵胡督撫延之幕不受功後謁選為
上林丞改良牧典毛屬理所部民事而部民挾內
豎不可問公曰上林者天子之園也若中貴人與

豪為政安用丞乃約詣中貴人訴者為越訴歲辦
牲課毋屑越入羨納饋申國法以示司禮內豎撓
法而司禮弗禁當以聞徃者丞巡行富家爭邀入
門置酒侍坐以為寵公不許曰安假此曹旁寺僧
歲以端陽作佛會男女襍至公禁之有訟其子者
諭以慈孝遂父子如初有殺人者前丞捕不獲公
至自詣服以公嚴明奉法然非好也常曰柰何令
江上梅花笑人乎廼奉戶部檄督浙賦比行署民
尚遮留為定均輸法戶三等課牲而竟不容於中

貴遷判膠州公作夢登蓬萊閣賦見志而仍苑職
致仕公為人豐碩脰有黑子如芡眉間紫氣徑寸
於思尺餘不肯屈於時而款山人野老甚昵自奉
菲而於客奢歌舞絲竹更進以為樂倚東郭臨蕙
江作五柳莊疊石為山引泉為沼樓臺軒榭百數
畝僅十而逶迤曲折可竟日嬉也卜生兆于蟠龍
山枕大江席曠野密邇莊園得從客星游足矣內
行脩飭厚人倫日謁家廟乃食出入必告時物必
薦事諸兄敬歲時助乏推產以業之配陳孺人同

邑眉山人曾祖工部尚書簡菴公雍祖封詹事府
主簿文篚父高郵州判官孟莊頎秀智慧多解通
工小楷語不妄發宜其姑而居諸妯末又宜其諸
姒善持家察僕媵之能出入置手簿課算不失毫
髮後多病公載孺人游西湖以適之卒於杭公嘗
置妾京師孺人以為望公遽出之然猶間置間出
孺人卒時有數人公哭之曰吾當以不娶報蓋孺
人卒九年而公捐館孺人以癸未公以壬辰孺人
壽五十八公壽加十子三如游如浙如潢游壬辰

進士浙潢皆太學生孫九人曾孫一人所著有漆園梓金臺梓白榆社草采薜荔咏北遊梓東園湯稿舒嘯軒稿嘯臺咏四明遊覽編虎林襍咏余觀古之建豎者不厭儉確不能建豎則去而逃於麴蘖山水亦不必侈侈者必有世資非空取而空用之也孫世清白無厚儲而公頗有侈聲世傳王陽能作黃金而有車馬衣服之麗豈其儔耶乃讀公及孺人傳知其費從羸竒范蠡三置千金而三散之昔人以此耗雄心送長日故吾喻孫之有公猶

子產之有子朝子穆皆不得志於天下者之所為
也不可以無聞為表於其墓

南京禮部右侍郎贈禮部尚書謚文敏後渠
崔公神道碑銘

歲癸未余預春闈中土得崔子士榮奇之果文敏
公孫也榮試吏十六年而猶然一郎夫公固守道
不售者貽謀之徵哉士榮為余言公葬未有碑丐
於余余豈能知公而足為公重抑不敢不諾會國
家有大編纂余裒昔之傳公者得九首而互詳略

為之一之今文人好以形似語易其所從來以俟
後人而系之銘傳曰公諱銑字子鍾一字仲鳧河
南安陽人父陞仕至叅政有蕪靜聲公少負竒弘
治戊午舉於鄉屢不第與三原秦偉馬理高陵呂
枬榆次寇天敘林慮馬卿同邑張士隆為刊浮篤
行之學乙丑舉進士改庶吉士授編脩預校孝
宗實錄戊辰同考會試執政欲私其子公不可而
執政子竟錄於他手劉瑾擅政卿佐謁跪公及脩
撰何塘遇之史館長揖他日史官旅見皆長揖瑾

怒謂張綵曰翰林盡白面輕薄生銑尤甚宜罪綵
不可實錄成瑾矯陞史官俸一級而調部屬州縣
以練政公得南驗封主事瑾誅還故官李文正當
國好文藝公勸以及時悟主救民薦賢理財強兵
書千餘言滿九載陞侍讀告歸嘉靖改元召脩
武宗實錄已直日講陞南祭酒明教條正文體日
坐東堂與諸生問難為名司成大禮議興江南北
饑人相食公應詔言事且曰比主事張璠等以獻
議驟遷而大學士蔣冕尚書汪俊脩撰呂柟編脩

鄒守益御史馬明衡乃罷斥御史段續陳相員外郎薛蕙至下獄陛下求備禮于本生至孝也顧當詳稽禮意大順物情獨任已臆曷其有既䟽入報罷歸無江南一物諸生悵失依已亥立東宮起為少詹事兼侍讀學士尋擢南禮部右侍郎撫臣王暉言句容朱家巷皇祖故鄉墳址具在宜表章公以為興王之基失實為罔竟寢之尋病致仕卒贈尚書謚文敏公好古敦禮不妄取出處矜然中廢居洎上十六年折衷群言廣授徒以師道自任

稱後渠先生其言曰道在五倫學在治心功在慎
獨不喜時之言良知者以為霸儒又曰讀經驗諸
行事卒至不駭可以即變矣邇言不狎可以出令
矣小物克勤可以舉大矣僕婢服義可以使民矣
初為古文詞鄉人或授以文選公不屑去學左氏
瑰瑋不韻人嘗作述居其略云客有告者曰先生
知今之所謂君子乎狹小賢括而動稱唐虞鄙劣
典常而談必性命非神非化不言德非寂非玄不
措詞先生曷知之以昌其名崔子曰是難言也聞

宋代有村如槧源其民食粟飲水不鹽不酪既朴而和年皆累百後通外人致美異更狡而夭况乎好新重異以常為陳陋紈綺而衣罽毯厭膾炙而食蜺蛤所好愈高所失愈遠夫水誠淡穀誠糲民可一日棄乎醉醲飽鮮且有伐生之患况蜺蛤哉吾見其驅于疾疾而已所著有松窓寤言中庸凡演大學全文士翼政議中說考文苑春秋讀易餘言彰德府志洹詞刪定二程遺書朱子大全子滂舉於鄉孫士榮癸未進士今為戶部郎銘曰黃義

而前風淳道樸史籀真文竹書猶邈勲華執中夫
有受來而其景運日朗以開尼父遡前斷從此始
若齊璣衡立歲綱紀豈無觭特喙鳴衡行太陽麗
空嚙彼小星云何末年浸以漫漶家則不競召戎
來竄有奎聚緯大興積微迨于曾玄亦或相誰是
無他繇匪衷之故甚精必愚或詭而忤窮經蹈躬
反性完初夫道洹然寧忘故吾有卓崔公中原和
理來儀聖明誨人規矩動徵洙泗暨於關閩學以
為已仕以為人處時潢汙堅白靡點天作崧高其

儀有儼往踐南雍青衿若雲退考洹室經耕史耘
乃晚而駕崦嵫載紉顧猶採榮豈其食實道世相
喪自古為歎馨則悶諸汴蕙谷蘭是時異者舍王
而霸公終不許道無假借王微猶一霸雜何居漢
豈不大終媿唐虞作書滿車日星同燦後世有雄
逢之暮旦我銘公墓不敢為容言必稱先道寓諸
庸其文雖史其事則野游夏不贊用信來者未緘
金匱立之墓明於千萬年來徵斯文

資德大夫正治上卿太子少保刑部尚書前

兵部尚書兼都察院右都御史掌院事贈

太子太保謚端肅麟陽趙公神道碑

蓋自王文成倡良知之學而其門多雜得麟陽公始尊公可謂特立獨行剛而不怒廉而不厲始終粹白皎然不欺其志者矣余始望公如虬龍以為不可親而不自意奉密游公著節以分宜始江陵終比其後又嘗悲江陵哀分宜夫憐者不詆詆者不憐乍愛乍憎人謂公何而不知此所為公也公諱錦字元朴宋燕王德昭裔南渡後家于越遷餘

姚至公復家於越曾大父玫大父昂父廣東叅議
公塤大父父皆贈如公官大母某母諸繼曾皆夫
人諸夫人以正德丙子生公性嚴整強骨自立當
其見之所至輒不可奪弱冠補諸生嘉靖癸卯舉
于鄉明年成進士除江陰令值邑大侵所活以萬
計而巨盜許貴者橫計擒之使者或以厨傳弗飭
讓公公曰寧讓令勿驚吾民卒不動三年徵為南
御史江陰人祀之已而祠毀於倭又改為之至今
蒸嘗焉先是嘉靖初江上下有鹽盜往來設總兵

於真潤間後罷十九年復設公言國家設重兵阻
要害必有嘯聚之寇不時之警難制之勢而未有
無事空食者真潤之盜不過挾私販剽商舶有司
治之胡足煩大帥勤二千餘戍徵錢廣募公私煩
擾罷之便 上從之時又乏軍興大農遣使四出
徵積逋且令入資鬻緹騎公言齊魯燕趙淮徐間
人相食安所得積逋緹騎侍衛王宮典詔獄而令
錢虜充朝廷體非大農議非是又言方今戶口流竄
宜專遣憲臣充招集使而山東河南撫臣尤宜久

任皆得俞壬子奉詔清滇南軍會元旦日食公曰
此陰盛陽微之象也乃上疏極詆分宜略曰大學
士嵩怙恩寵以張權假刑賞以固貨事無大小欲
稟承於己人有少違必陰中以禍百官懾息諸司
望風希寵干進之徒頌美功德比擬不倫陛下
自以為予奪由已題覆由諸司閣臣不過票擬取
裁不知未題覆已受其風旨比票擬兩存其腴臆
群臣敢怒不敢言陛下安從知嵩柔佞奸深窺
俟逢迎之巧似忠勤諂諛側媚似恭順引私人布

要地探諸臣動靜而先發制之故少敗厚賂左右
具得起居故多稱旨時獻小諍似不阿而不知嵩
特取 聖意所不經者稍執以絕疑陽不預事似
不招權不知脇制諸司莫敢不從或就 聖意所
發直而推之或乘事機所會衡而執之使 陛下
思之本發於朝廷無迹可尋故諸司常代受嵩罰
而 陛下亦代任嵩咎今內外之事非賄不行百
官失職戰士解體民生愁急皆以嵩故宜早罷黜
以應天變書凡萬言分宜父子大憾遣緹騎萬里

械公墮車者再入坎窗輪過其上不死至則下招
獄拷訊復擬廷杖百賴肅皇帝聖明引筆抹去
獨除籍而已方是時衆議公在粵亟授劾去父子
守四壁酌水春菽歡也居八年喪衆議公又七年
莊皇帝以遺詔起公為御史尋為太常少卿光祿
卿奏罷端午龍舟之戲又奏折江陰子鱗及蘇松
常鎮白糧減耗明年以右副都巡撫貴州土酋安
氏跳梁公宣示恩威得其力以治諸苗之反側者
遷大理卿工部右侍郎尋轉左昭陵之役屬公

督理公謂陵恩大吾不可屢叨讓其右萬曆二年
轉南京右都御史歷南刑禮吏三尚書江陵方秉
國公無所阿時風議其得失江陵患之令所厚劾
公去江陵卒推南吏部尚書尋入為左都御史掌
院事朝士瞻以為趨而楚獄興斥其黨殆盡諸御
史益引繩披根所不快者至擬今日去某明日去
某某為元輔某為太宰好事者囂然和之有賀公
者曰衆心儀公少默則太宰矣公愕然曰是何言
大臣由聖簡何物僉訾得私除乎上書言言官論

人當程品業不宜驟詆毀乞起諸大臣出視事而責御史存國體於是諸大臣復安楚獄上詔籍其家公嘻曰甚矣借嵩為喻而上言曰昔嵩怙寵行私世蕃為奸利聖祖逐嵩捕世蕃而言者不已至謂世蕃叛籍其家以意擬當如千數而後不副則株連盈之上以為此真世蕃物而不知強半出他人家且非叛也今憤居正則過其言臣竊料其蔽宜不能世蕃十一而恐他日之毒三楚十于江右且嵩敗後閣臣顧患不任事而居正獨受知

不顧患又過懲之後之閣臣懼矣奪其官爵謚號
黜子弟為編民已足正罰何則居正生平操切罷
斷富貴決裂名教故四方之怨歸實未嘗有異志
且受先皇顧命翊上冲齡夙夜勤勞中外寧謐
功惡可泯惟陛下不忘蓋帷之義所以光聖
德全國體者不小時上怒江陵亡敢言公疏上
或為之吐舌或為之側目上雖未盡從而張氏
終被恩得稍解孔門從祀之議興衆論盈庭公力
言文成白沙二先生當祀議始定滿再考加太子

少保資德大夫正治上卿駕幸山陵再奉勅居守
已改兵部尚書總憲如故丙戌計外吏公欲有所
激揚而會魯太夫人訃弗克葬于姚六年而復起
為刑部尚書再辭不允方就道而三䟽之次蘇州
疾終訃聞上震悼贈太子太保錫祭葬使使者
起墳謚端肅焉夫人尹氏無子副周氏生子淳卿
南京刑部郎中葵蘭亭之婁家塢余嘗謂學者平
情于好惡之難見善人而好之見惡人而惡之塗
之人盡然何必君子所稱君子者善惡之等萬而

善善惡惡之等亦萬稱其情實不爽錙銖而後謂之平江陵之獄欲縱之與欲深之者其心非盡公其事非盡平而不欲寃之者惟公一人若分宜本公所戰手怨又骨髓也而猶白其子非叛撫貴竹時見分宜厝道旁為之咨嗟徘徊屬監司護之乃去此豈以好惡柴于胞者耶此其好惡豈為分宜江陵起耶世之學者一好之終身不忘一惡之終身不忘嗟乎得趙公天下不足平矣嗟乎余又恐昧昧者謂余以趙公之憐故相而稱也則愈悲

禮部尚書兼東閣大學士贈少保謚文端對

南王公暨配李泚人神道碑銘

余與公同舉戊辰讀中秘書官詞林供事講幄甲申冬公入政府而後十年余待罪蓋出處略同此心而彼贅矣公議冊立不合去然上從造膝來稱公端人早登延大用雖去未嘗忘余欲銘公而汎瀾太息不忍者久之公之初奉廷對也制策以時政機要為問問出江陵閱卷時興化顧江陵機要云何江陵曰機在用人要在責實而公對獨中

繁興化大善之擬首已以太著置第二會先帝
手拔三卷居前而公遂為二甲第二選庶吉士庚
午授編脩實錄成擢脩撰乙亥充經筵日講官故
事日講必尊宿老儒而今上典學勤江陵乃超
用戊辰戊辰至是纔七年而脩撰直者自公始編
脩直者自余始然余等皆伉節終江陵世雖勞不
遷壬午公始為洗馬為庶子踰年為少詹事兼侍
讀學士掌院事甲申領教習為禮部右侍郎改吏
部其冬上手勅改左侍郎兼東閣大學士入內

閣叅機務與太倉同麻而拜于是去登第甫十六
年綰朝寄最早自嘉隆來獨吳公與公耳公既蒙
被非常益慷慨冀一當諸奏對票擬多所贊助時
奉召對以繼母景喪歸廷議請補闕不許己丑行
人奉詔以禮部尚書復故位上久輟朝講公至
三月未得見而章奏多留復不豫建太子公以
為時政無急於此因萬壽節䟽請見舉三事言
上為感動視朝而公方待命不入上知之再御
門見公明年元日上開毓德宮擁皇太子於

滕召輔臣見諭以保愛至意公同吳歛太倉三公
以冊請四月復以災異同䟽應天之實而公復獨
䟽謂臣來浹歲嘗陳天下大計不宜與諸司章䟽
並寢又言臣無狀不能導主德于緝熙保聖躬於
元吉大本未定隱憂更多因自劾上遣使敦諭
彊起之已同三公合群議請冊有詔切責三公皆
引疾公獨在直請諭三臣出首輔出而歛太倉章
尚留公曰聖諭甚明宜趣二臣出與首輔擬冊
立豫教之期上乃下二公章復特諭冊立出閣

十歲後並舉公遲之再請明日中官李浚宣諭云
冊立事如明年春夏無激擾明冬行否且俟十五
公喜事之有機也第口宣不可據乃擬傳帖進堅
上意而復語部科䟽之上猶持初議責置對奪
俸明年秋主事張有德以造辦請獲罪時太倉公
已省覲行吳公又在告公懼成命遂渝亟與歛公
引諭旨諱之具三臣名上益不懌責輔臣附和
更遲冊三年歛公從此罷歸公言臣與國一體國
今所請臣所傳也國具揭臣實從愚之則臣誤國

自臣傳諭以來部科諸臣踵得臯誰實宣之而今
若此臣又誤諸臣且 聖意已定而復搖言期已
屆而復改臣誤社稷乞與國俱罷報聞吳公亦遂
乞身去 獨以一身處父子君臣間周旋調護良
苦念終不得之於 上固求罷手諭攜藥餌扶掖
入直公不得已復視事因請肅使促太倉公還朝
而明年春科臣李獻可等復請豫教降罰有差公
謂言者連得罪群猜益多封還御批請寬言官臯
上加斥杖而別旨謂公希名公云名非臣所希也

而非敢棄臣所希者期上為堯舜而臣為堯舜之臣若犯顏觸諱抗爭被譴何名之可希必不希名將使臣固寵持祿闕主違而莫救睨政亂而弗匡國家何賴焉更使臣棄名不顧逢迎阿諛若許敬宗李林甫是九廟所殛而萬世罵也科臣豫教之言非謬譴呵一出遠近皆驚讒構將興隱憂方大臣若洪忍苟容則汲黯所謂阿諛承意陷主於不義辱朝廷者臣安敢疏四上不報在廷為之震懼而公益排擿久之上度公終不可留乃因廷

試辭讀卷聽公去蓋建儲上意自定第重發而
疑者日紛故公疊疊為上精言之冀絕釁萌天
下因公之去益不能揣摩而後二年皇長子出
閣講學辛丑正位東宮上未嘗不用公言也公
為人溫厚和平喜愠不外見余嘗比之韓魏公而
猶露朔氣于英主前事幾相激夫何可定建儲時
余為請存問上欣然從且任一子中書舍人聖主
至德可不謂天遠春盜哉公嘗分校禮闈主武闈
教習庶吉士兩纂脩世穆實錄士出其門者有

師法脩史據事直書無翫筆居政府持大體武弁
群而噪大司空或謂黨衆不可問公謂武夫廷辱
大臣不法何以為國卒捕治奴有私乘驛馬撻之
不少貸家事治公雖浩然長往然愛君憂國不哀
其表謝存問也拳拳以罷礦稅起遺逸為勸所貽
余書毋一非法言不及私蓋余輩自傾蓋至今類
若此為文不屬草腹定不竄一字考經據典而文
理具備嗟乎古所稱社稷臣極誠毋貳臨大節而
不可奪者真其人哉而彌天鴻業徒贊一大計他

人之賢者及此為幸公則未能萬分一含德而藏
非余始望悲夫公諱家屏字忠伯別號對南其先
太原人徙居鳳翔還雲中居山陰遂為山陰人七
世祖顯顯生文秀文秀生得林得林生冲冲生縉
知臨邑縣事有惠政縉生黃坡公朝用黃坡公生
石溪公憲武是為公祖若父皆贈吏部左侍郎無
東閣大學士祖妣趙妣韓梁景並泚人公韓泚人
出也北邊以武健雄資為豪而王氏獨世世長厚
好文學積源流慶實天生德執政三載當書考而

拂衣故贈未逮臨邑祖父母妻不益封未任子元
配霍氏封兵部主事宗嶽女未廟見卒累贈泚人
繼李氏處士松女累封泚人李泚人性勤敏佐公
事二人一切倚辦既貴猶布素人以杜氏綠輿方
之公不得志懷歸泚人輒贊決卒後公每誦室無
菜婦語而泫然也公生嘉靖丙申卒萬曆癸卯年
六十有八李泚人生後公一年而卒先十年並葬
業乾之陽丈夫子八孫六曾孫二求余銘者長子
孝廉濬初與其弟思生湛初賜贈謚祭葬有加籙

遣司空之屬將作復任一子符丞銘曰天生聖人
為萬曆皇有赫中興爰畀上佐傳之八翼捫焉
而升西清燕閒誦說虞周可咸可登在天左右跣
而視地其直則繩宗社大計萬喙合鳴扣闥莫唐
公為史丹伏蒲引義涕流濡膺臣謂明主可以理
奪非間可乘言而見吐臣臯靡原無羞疑永叩天
子葵之雖游赤松翼雲飛騰前耀輝煌鸞書驛來
慰余股肱雖不久留猶身覩之丹心有憑聖渥天
悠臣謨日皎振古無朋我勒銘詞麗牲之珉永公

之稱察察千載訊筌與宰將茲焉徵

資善大夫工部尚書兼都察院右副都御史

晉川劉公神道碑

上所簡任九卿得先帝戊辰多豈秘省之儲從
秘省出尚七人晉川劉公其一也公之歿東阿為
之狀山陰為之誌而以賜阡之珉屬余自余預機
政借前籌莫如河漕戊戌之秋得公而始有所藉
手則余之悲公其國恤也公既繇常言改兵垣用
婁非謫蒲丞徙知廬氏萬曆初召補西曹調民署

乃僉豫臬叅議關中督學我越中歷齊楚藩臬長
晉中丞撫保定已協理中臺佐邦治奉尊人喪還
里久之以河決黃堍起少司空兼僉都明年上功
拜尚書敭歷中外三十餘年官階十六易而嫜節
懿行未易縷數所為難公者則西曹時與大司寇
爭疑獄司寇予死比公傅生議司寇不能從竟以
失入譴而人始服浙故多材先是學使者行剋核
之政公至則衡文采實不為毛舉所甄拔皆一時
秀髦在西輔適無秋而有倭警師宿於天津羽檄

旁午公外調兵食內理荒政是歲也饑而不害博
陵盜起嘯聚至千人所司議剿公曰不然好則人
怒則獸草薶之不忍下令殲其魁餘勿問人謂劉
公尺檄賢於十萬師故事河與漕皆設府上以
公宿望舉兩府屬之監司守令受節制者七省公
謂河漕患有標本而工無緩急循商丘虞城以下
至於彭城得所謂趙固者賈魯故道也而鳩工焉
開積壅䟽支流隄堰閘壩增卑倍薄延袤若干里
不淹時告成上嘉賚晉秩廕子於是有二湖之

役二湖者邵伯界首維揚之巨浸也涉者虞溺公
闢裏河避之行旅無恙于是又有加河之役加通
淮海渠成則漕無乞靈于河也公排群議躬開鑿
有渠形而病公故恂恂長者至講畫大事不惑于
呶呶之口趙渠潘司空患費而止者也加河舒司
空鑿而中輟者也力主必行人多公之斷自少不
問家人產耻言錢穀而行河經費指計無爽趙渠
僅費金十萬二湖三萬加七萬畚鍤雲興未嘗不
宿飽人又多公之辦為政持大體恤民瘼行河時

籍郡邑城旦以工役相準所活無數病既篤乞骸
于上不許則從床箠中治程書不及私所謂致身
者非歟公宦蹟最多而行河為烈昌黎有言君子
所以信于天下者在行事適機宜而風采可畏愛
也公之後河議築舍王家口乏成效而益厯公思
也或謂公經世不必復為出世學所論朝聞夕死
即山陰東阿猶河漢其言余謂孔子有浮雲堯舜
亦有浮雲腹水者亦自曉冷煖耳未易從人品量
矣公名東星字子明號晉川山西沁水人世居邑

坪曾祖文住有隱德大父得保父賓俱以公貴贈
封吏部侍郎母牛泚人生嘉靖戊戌卒萬曆辛丑
年六十四配李累封泚人子用相貢士娶韓繼娶
栗孫男一銘曰藹藹吉人維國之楨維岳之靈秘
省起家禁垣司駁直聲嶽嶽鳴為陽鳳斥為仗馬
誰為為者逍遙如往即丞即令不容何病迺晉爽
鳩迺治爰書明允疇如師模我越鑑不遁明器無
失型保釐齊楚以教以撫允文允武輦轂之西是
拊是飭保障馮翊銓衡重寄特簡以貳山公啟事

奉諱而旋 帝優其卹人跂其出河伯不仁黃涸
為墟廷論攸歸召拜司空荒度土功爰濬趙渠賈
魯之蹟其涂可闢既奠二湖浮沕其期胡不少須
鞠躬匪躬古之勞臣吁嗟百身誰而喪道誰而喪
世何思何慮國評已定易名之章俟諸太常我題
其碑採彼輿議風于有位

資政大夫禮部尚書兼翰林院學士贈太子
少保琢菴馮公神道碑

贈太子少保馮公琦字用韞青之臨朐人萬曆丁

丑進士入翰林為庶吉士授編脩歷禮部尚書兼
學士歲癸卯卒於位壽四十有六海內士人識不
識恨不大拜究厥施而 上亦云是前輔錫爵所
嘗薦者為憮然云公天質竒瑋氣朗朗絕塵學無
所不闕期于致用入史局益究心我 列帝與謨
洎先臣條畫供奉日講十餘年所陳說治本亂萌
比古諷諫積有若干卷為侍講官坊時或議開五
臺礦可助邊則移書守臣此千數金幾何而今他
日有聞而臆使者孰利多寡也東朝未建下詔並

封三王則立奏記太倉公有祖訓在太倉公亟引
爭直謂左庶子馮某語臣如此為少詹事禮部右
侍郎時倭在朝鮮封議興則言倭跳梁海外方張
甚安所急吾封先是寧夏卒據城畔公策之謂宜
用間無急攻而輕決河灌城微獨多殺傷士且恐
水壅猝難自反即以雄鎮百萬命易數賊首未稱
得計矣罹外艱家居聞朝事有不可輒憂於色西
虜創後談者爭言罷市公曰言何易哉曷不問內
備而亟挑釁為所與諸制梱書權關右雲中上谷

緩急甚晰師救朝鮮咸疑我不可代人受兵公曰
我非救朝鮮乃爭朝鮮漢人故用西域制匈奴矣
假今朝鮮折而入於倭且代倭難我惡乎其不救
經略邢大司馬濟師公力贊之今日如唐蔡功斷
乃成耳倭既遯異議猶不休公謂諸臣久異域轉
戰數千里藩屬復完不可謂非功即有所亾失詎
可謂罪此其前後料敵無不踰度懸中者其在吏
部入則佐太宰澄流品出則廣延見周咨詢隨人
地資望而劑酌所宜䟽定銓格每月旦書其需次

之俸而揭諸屏次銓之既月復如之幾幸者乃無
容私而故事計外吏有疵者悉署不及公謂京考
有浮躁之目浮躁者過之非不及也必正其稱乃
服人心疏而增之蓋少宰二年而草建儲停礦稅
疏甚多皆剴切曲盡善以邇言微語作轉旋上
諭及君臣一體則為群臣引咎以微動之楚璫陳
奉罷還則請釋其所誣逮者郎以推勅降官被詰
則言今選曹不易為宜容其以落階供事嘗譴職
方空其署則請免其比舍不預事者而因備列數

年中所連坐者咸宜甄敘其因事納忠多此類也
上或用或不用顧察公悃誠而時為霽威將舉三
慶典特簡公秩宗三日而具儀俄司設璫稱訕欲
改期公瞿然曰中外眼穿此舉今已晚何所得若
言遣戶曹郎輦遼餉四萬金出都遽以便宜止之
而畀司設禮遂成因言 上以大禮成歸功 聖
母親朝長信宮加徽號事親至孝願持此事天躬
郊祀之禮 上勞之云其湏三殿成壬寅之反汗
也公抗言聖體危而復安何可令聖德光而復晦

播二三之令失億兆心後有緩急人誰信之亦思
瀕危時有金如山何所用哉復以灾沴三䟽論中
使皆報聞其得稍禁抑者若晉璫孫朝訐魏中丞
允貞而言貞清操無兩臣願以百口保得不問張
忠者掊一令宜調高寒者輓一藩使可巡撫公言
此輩何知安可令侵黜陟權饒倖既墨敗緣稅事
希復留公削其籍舉璫李鳳為其翼堅營貲官公
謂大司徒何可令此事自今始俱得寢所遣璫乞
關防至再公固毋與上廼以牙章代之而佐銓

時痛故大司馬張公經讒死白其寃與卹典麻方
伯溶卒貧請特贈太僕卿典禮時疏覆故相高公
拱有款虜功卹贈賜謚通政使沈公子木請復
建文君祀議廟之于懿文側若申定宗制則議
罷秦庶長子封奪崇繼妃封皆據法持公凜凜必
行無虞中格與旁撓也秩宗二年疏復十數上易
簣時猶刪其嘗所草牘而奏之比于尸諫遲明度
疏入乃瞑嗚呼可謂致身盡瘁矣弱冠登朝二十
七年自以世受國恩念所為報主承先者畧刻在

慮大旨欲引當道顧先務自捐成心厚集君子之
朋乘宜量分而精圖之恒言今朝士自相猜何由
信于上不信則不任不任且旁啟竇必也至誠
至公息爭絕嫌庶有濟乎又曰吾儕當以體國奉
公為先別白是非為後誠意感通為先犯顏觸忌
為後寬一分有一分之益成一事有一事之功毋
為艱鉅輒諉噫此真救時要術古大臣詎有易哉
斯人之早世也大命也夫余屢隕涕而為之碑銘
曰方公誕時於鑠有徵銜火曜闡母也寤興王母

曰嘻覩冕而絳稱宋魏國昔於來降襁斯環寶肇
叶嘉名誰能叶之實韓載生煜燁五雲著祥臚句
藜閣蘭臺亦茲早遇若韓焚草公乃積誠若韓決
策公乃不驚若韓籌邊匪旅以勝若韓鋤奄匪勅
用正長流深壑淳乎厥神高山大岳龐乎厥真謂
稚圭誰吾用韞是來去一身曩今間起孰氏爾韞
窶位與年窶位與年人胡却前我書豐珉旌此靈
域重来何時祚我明德

奉政大夫雲南按察司僉事致仕累封資政

大夫都察院右都御史兼兵部右侍郎贈
兵部尚書兼都察院右副都御史文塘塞
公神道碑

蜀有僉臬蹇公封右都御史以萬曆丙申之孟冬
乙酉捐館時仲子理菴公方開府薊遼也請終制
上推恩予祭加遷給少府金錢葬居數年理菴公
再開府薊遼晉大司馬貤贈公而屬余題其神道
之碑夫世至嘉靖末嘗一太濶矣賢者仕于其時
多不得志而天不其然賢者必伸不於身亦於其

子孫吾固知豹隱之為龍變也公諱來譽字子志更字子脩先世楚監利人入明而法興者隸重慶尺籍七世為贈尚書公廷相娶姜夫人而生公嘉靖癸卯領鄉薦第三人于時贈公已下世公從錦城歸不之家之墓所告哀閭里傳其孝三上公車庚戌成進士出青城毛太史門而先是大司成孫文恪公拔公於多士中為之易今字蓋已聲動長安試政於西臺大中丞余鄉屠公異之擬為御史公矯矯亢節不肯下柄臣子請就恒格得武選主

事守典常有千夫長請醵函金於茗餉公公置之
法用是毋復苞苴其門者晉職方員外郎出為陝
西按察僉事治兵屯兩院交薦異等會以天變計
百官齟齬者緣柄臣子意謂公為郎時嘗市其故
同年方選郎宅豈誠廉士哉顧此公拮据義舉而
更以謗也不買宅也者患無以中公乎左遷蒲州
同知署臨晉縣察廉晉臨清知州歲大祲施賑多
州故為估客聚凡羔雁之費取資焉甲子當入覲
吏用例白而公大駭不可寧垂橐入都門也何

晉南車駕員外郎踰年廣東僉事備兵惠州曾一
本起議剿而公謂粵人苦餉此一折簡足辦撫之
便議與李中丞左投効免而太宰楊襄毅公蒲人
也善公之治蒲特徙雲南再推叅藩又以南曹時
與鄒司馬議左歸矣蓋仕歷二署二州三臬司俸
餼外無長物產可中人從此掃跡公府與其鄉大
夫劉中丞馬太僕徜徉塗山巴水間理菴公業通
顯時時緘祿賜又斥以贍族澹如也劉中丞歿所
後子同仁為族人困急公百方定之同仁有獻于

陽明文集卷之十一
公公笑謂吾自為義非為德毋令我慚生平內豈
弟外無緣飾落落難合然去後常見思撫其弟來
顧來連為營貲產畢婚嫁訓理菴公大指如其所
自脩者督薊遼每詔書戒貪功曰枯戰士骨以簪
佩其子孫罪也非福嗚呼廉吏可為不可為哉回
翔中外二十餘年屢失意當塗投老林壑不悔有
子為名卿又戒之恒抑不敢尸廉吏烏不可為也
吾知斯阡致大鳥矣公之封加於其身所為官者
四一平陽知府再大理卿三右都御史而埒為尚

書年七十有九配王氏累封夫人與之偕藏銘曰
擁轡而出肇敏戎功韞而藏諸以厚其終授綬而
歸既膺繁祉橐而遺諸以開其始廉者不受受天
不廉人之所畸天之所無唯德能膏開具子美膏
之浸流寧啻千里鳳山之阿豐碑峨峨我有傳耆舊
予言不磨

邵武府知府封中憲大夫都察院右僉都御
史越湖邵公神道碑

余友于邵世忠所謂莫逆於心者也居常相期獎

王室而今已矣世忠嘗欲余碑其先君之墓余諾之而補為之公諱德义字原可祖宋康節先生蓋自先生三世為徽猷閣待制溥從南渡家於杭七世為新昌令溥家會稽十一世為奉化牧子泰家餘姚從子泰六世為金谿訓導珉生文達是為贈司空菊莊翁翁娶朱宜人生二子長德容甲戌進士兩宰廬陵貴溪擢刑部主事伉直左官次即公受大戴禮苦學贈公憐其弱禁之而誦如故病疴二載且病且誦後疴已嘉靖甲午舉于鄉五上春

官不第已酉公長子型亦舉於鄉同上計又不第
謁選六安知州六安者即刑部君所嘗佐者也公
習其政而加勤日聽數十訟無留詔州之人有丘
公者方守寧波寧波與餘姚比壤而丘公嘗折節
公丘公子橫里中侵人地人訟于公公跪之庭而
譙之曰吾與若通家道義相期望若亟還彼以效
豪子弟為也卒還之自是州無敢橫奪人者其他
興學校表節孝明保伍脩水利清浮詭省供億裁
冗役卹里甲以不秩秩同邑御史大夫麟陽趙公

之不公也親巡其境亟推轂以風甲寅轉右軍都督府經歷人以為不酬隨改工部虞衡司員外郎監寶源局鼓鑄精工奸弊為釐丁已轉都水司郎中督理通惠河時三殿工興吳楚荆蜀之材銜尾行涯中大司空豐城雷公器公是歲倭薄餘姚餘姚民夾江而居江以北為城江以南民廬稱是而學宮倉廩在焉公與少傅呂公計言於上城之倭用不再來滿考陞邵武府知府至則閉閣立科條與吏民約民困守藏之役蓋郡寮皆倚辦于藏故

困公令守藏者毋供郡寮直指因下其法于七郡
咸視邵武諸郡由是嫉公而司理吳某尤甚先是
倭犯邵武至太寧殺一簿一指揮庚申徵廣兵來
道出邵武光太間公曰廣兵悍無律而光太未城
可憂也請城二邑而太寧令憚經始不可公召其
人曰父老得微受令旨偷安便乎得微患畚鍤鑿
鋤斷之不具乎吾為汝計不括民一錢皆以官
帑幕人為耳三月而成廣兵果猝叛無所掠去民
始歌之在郡二年庶幾德禮長者而吳司理中之

直指列考察疏中太宰安陽郭公知公賢而奪于
分宜子之不譽聽父老歸之日田廬無改於舊而
刑部君年益高家益貧則以其有無共之集子姓
談經藝論時事教訓行於家故子孫遞興世忠與
余舉進士讀中秘書既衣繡行吳會間別余曰家
大人有積仇深恨於吳柰何蓋吳司理雲間人罷
官家居公居常切齒世忠以為憂也乃世忠將之
部便歸上謁公迎謂曰御史奉三尺法行天道昔
人有言人有怨於我者願我忘之人有德於我者

願我弗忘之汝知之乎毋言吳子世忠喜奉教抵
部則吳之仇紛來告而世忠悉弗問且為其子雪
他枉吳人怪之久之乃知公之命之而翕然稱長
者公孝弟薦行執親喪盡禮兄弟無間言居官所
至見思或立祠或頌德云夫人吳繼張側室王閨
門之內雍雍如也有丈夫子八型饒陽縣知縣璧
諸生陞太湖縣主簿陞司寇公世忠坐諸生主鄉
進士堤堦皆諸生孫十六人曾孫九人人謂之玉
庭享年八十有五邵氏訓導翁八十贈翁九十二

刑部公九十四稱世壽云邑之治山在穴湖桐之間公之父葬於是山中有丘為公夫人吳與張之墓湖之北有山翹然秀而與夫人丘相望不百武者世忠以為佳而奉公窆焉葬之日為甲申九月沈一貫曰余嘗亟見公公雖老矯健行如飛語直截張口見心無二言生平甚勤居無一息停稍間走他家問其舉事某某當如何而擘畫之故其居官官辨居家家理不持人一物而不負所讀書終身不忘性不能容人過常面罵然好善無間識不

識擊節歎賞不念舊惡所謂古之遺直非歟身享大年子孫貴盛固宜銅梁張司馬之稱公也謂公具四德余何能間表其墓以詔後人

行人司行人累贈禮部尚書無翰林院學士芹泉馮公暨配封太安人累贈夫人蔣氏

神道碑銘

語曰樹德務滋此言何謂也善樹者不倚一旣其榮幾何重陰密膏沃條浸枝葉葉相承積朝累時而後其興也勃然故培其根不達其枝無沾濡之

勤而冀德之能厚我未之見也以予觀于馮而徵其滋德厚哉大宗伯之生非偶然也天將寄之以國家之重也端淳閎奧抱忠持公自頃入朝典銓典試天下之士交慶有所依儲位尚虛也而時時惠臨余教之以所不及珠璣字與珠璣淚交萬行下余獨知人不知也若乃考典酌宜才瞻知足又其餘矣今臨胸馮為天下才士藪而盡發祥于閭山公自余公車時覲海浮公於京口後少洲公典我兩浙文衡而余又與仰芹公同舉南宮乃今與

大宗伯同林生得納交於諸馮傾蓋如故而白首
一日也可不謂幸焉閭山公諱裕某科進士官至
貴州副使芹泉公諱唯重嘉靖戊戌進士終行人
海浮公諱惟敏某科鄉進士終保定府通判少洲
公諱惟訥亦戊戌進士陝西布政使仰芹公諱子
履余同科進士河南叅政而大宗伯琦仰芹公子
戶部郎瑗則海浮公孫也歲壬寅 皇太子正位
東朝上徽號慈寧宮於是芹泉公仰芹公皆贈大
宗伯而大宗伯將奉寵貤賁丘隴謁余為芹泉公

登夫人神道碑余以是感天道之不爽而欲勸天下之積善者得無言公字子威先本青州人洪武初徙實遼左至閭山公貴而乃去廣寧歸臨朐閭山公有丈夫子五長治泉次公次海浮次少洲次萇泉而公少英穎十歲能文章讀古人書所當意輒手自疏記弱冠補廣寧生傾其曹歸齊又傾齊中生齊魯文學天性而翻從遼來者稟學屢交錯于戶也既侍閭山公之白下又傾白下生若許石城邢雉山諸公無敢以鴈行進者博士業之外有

餘力為詩書法道逸嘉靖甲午薦於鄉既成進士
授行人明年肅皇帝幸承天奉命告湖湘馳傳蒸
潯中至廬州而病疽守土者咸甚且歸家治可活
也而公固謝不敢委王命於草莽寧死公知死所
矣春秋僅三十有六而是時蔣夫人方舉仰芹公
於邸中駛步報公未至而公已卒夫人慟欲死以
呱呱故不敢死公家雖積貴哉尚食貧夫人歸則
手拮据為朝夕計脫簪珥以資子而所執脩脯皆
自機杼出夜則篝一燈課織因課兒讀語未嘗不

稱先志勸使立堅而卒成子進士試方城令稱良
事為邑馬部稱望郎藩臬秦晉所至有聲可以
徵夫人之教愛師長進亡時上母節于朝詔旌
其閭為郎時贈片帛而封之矣又十年而大
宗伯以太史持節過家子若孫蟬聯軒冕奉觴為
壽夫人始色喜而念公之不及也則慙歎罷酒夫
人後公一年生其卒也後四十四年或不足於
數或有餘於數脩短有間而總之從甘荼集兼歷
生人所大不堪事而後乃高朗大閔也夫天之報

人不報其人而報其人之天德積以而不知者天人也行一善輒操而責報于天責天亦太詳矣而安能達天善之大者遊於善之中而忘其善若魚之遊於水而忘其水也故魚以縱水為樂而小汙無巨鱗善亦猶是故不知其形視其影不知其衣視其裔公沒於使夫人立孤而有叅知為之子又有大宗伯為之孫大宗伯方將益滋以繁蒼生此其先必任心所觸任口所言無之不善而後有此何獨家慶實乃國禎可喜也狀又稱公幼與台泉公

年相若也而師事惟謹長而豐順脩幹譚傾座客而不以能驕人洞夷無城府見者驩然若飲醇終不箕踞邊坐醉則起飭容滌器更為峻整可以想見其為人矣弱冠時故清河令蔣公器之曰非凡子以女女焉甫逾月而閭山公謀南遷閭山公配伏夫人念新婦之歸寧不可期也以為難而夫人曰已奉父母教事夫子惟舅姑命於是盡室行逮公得舉從家宴閭山公泫然思臨閭之阡而時虜數入行旅阻絕公度關而東馬上左右視烽火隱

覆而行月餘始達展拜除荆棘築垣刻石省外家
而還此公與夫人去采遼齊之跡亦足見其一斷
大義而勇從令以為孝矣系之銘曰泱泱海岱大
風之遺孕發祥靈文昌陸離幼安去遼季和開里
唯公白眉於焉鳳起動禮靜法郁堪人師造對大
廷羽儀天池載馳載驅不辭鞅掌無辱輜軒何慙
玄壤有嘉泚儷栢舟之貞之死如飴而孤在綢立
孤實難既弓既冶旌書封綸紛從天下於戲樹德
自根流枝豈惟流之累世其滋偉茲哲孫廼昌以

頤北門振藻南宮曳革帝唯汝翼予拜貞三錫
龍章以賁爾祊方茲倚毗方茲提顯日光月大靡
幽不闡慶餘惟積天實有知謂易不信視諸豐碑

封通議大夫兵部右侍郎兼都察院右僉都
御史贈少保兵部尚書湖西李公暨配封
泚人贈一品夫人吳氏神道碑銘

蓋長垣有于田李公國家寶臣哉虜急屬虜夜郎
急屬夜郎而河急復屬河互急互應有饒餘夫雲
構之材非一時之植也傳毓深而封藝茂矣于田

以其尊人狀來曰袁其實而加藻焉惟惇史之惠
不佞之儀于田也自甲戌孫文融言之而未之暇
朝夕也比不佞預朝政則于田上遼功遽告歸播
事起不佞與田大司馬江內于田在外蜀去京師
萬里而兵事亟不可以待報然于田之所規厝奏
來無不可而余與大司馬亦每每先時取肯待于
田悉符合聲氣求應故不勞而成功于田奉父諱
歸初禪會河決求總理上復思用于田于田乃
開加以成漕而復奉母夫人之諱於是錄播功進

于田少保兵部尚書推恩三代如于田官官其子
錦衣衛指揮使世世勿絕余乃從而銘之公諱棟
字良材別號湖西子李之先蒲人國初徙長垣治
蒲而李為之望瑾生公度度生鐸鐸生蓁蓁之季
子誠盱盱承生贈公繼古是為公父盱盱公贈公
今皆稱贈少保公然難為名今稱盱盱贈公及贈
公云贈公瓌姿容饒大節李氏故雄于貲邑有大
繇必先及而盱盱贈公五子率畏巽自逸贈公以
第四子主辨出入于邑庭邑中戶以下率受指而

年甫三十豪飲卒時公方七歲耳呱呱泣而母張夫人不忍其讀休之長始脫身從外父吳公游讀輒了大指吳公方以為快而會諸父析箸於是受薄產母張泣公曰夫男子所患豈貧哉猶有負郭田二頃不為貧乃棄儒而脩於茅乘屋播穀之業輒倍收舉于田兄弟知其非凡子請業于母母曰若祖故太學選士也我欲以其遺編屬爾而爾後時矣之二子者我相其讀而爾力耕可哉公乃以二子侍母于邑而之田時時來視甘毳分其餘二

子訓之曰爾能代我儒者是能代我子者終弗儒者是使我終弗子也于是二子咸奮而于田年二十一成進士為嵩令之官強公偕不可久之一往而得其所為治狀喜孺子勉之吾廼今一意歸為農不者且減我汙邪于田跪進其俸錢則又云孺子無念我我田亦有餘也既于田滿三載封公文林郎冠服輿馬御即函之屏之一當鄉飲酒禮為大賓輒謝不再而壬午又進封奉直大夫南京工部郎中是時母張夫人春秋高公斑斕膝前病則

露禱身代而卒之日哭泣過杖乃起至性如此于
田之為學使也瘁而請歸公報曰惟力是視不能
者止而會以太僕召不果及建中丞之節以撫遼
又請歸公則曰東氛惡豈有節使而言私于田乃
大破虜于鎮武堡斬首四百獲橐駝馬數千天
子嘉焉晉兵部右侍郎贈祖封父錄其子世世錦
衣千戶公嘉而貽書于田曰天子使田舍翁為
夏卿小子何以報於是于田度公終不聽歸而以
病請于田歸公亦不恠從此不復問家人業獨與

邑中耆英結社立二子侍酒居一年所而播人反
天子就拜于田總督川貴湖廣軍事于田重違親
疏辭而天子不可欲再辭公不可曰君有急安
以親為解吾健飯恨不偕赴軍爾尚何云于田乃
之官時賊已南破黔飛練北殘蜀綦江殺二將張
甚公雖知于田辦賊于田亦自言鼠易捕顧須一
歲所而無如流言謂賊且有西南江左中原悉登
陴公意不無動遺書好為之勿以賊遺君父遂漸
減食嘔血不能起病革家人或寬之曰羽書來已

臧賊公蹶然起曰審乎曰然北面連呼萬歲者三
而卒訃聞 天子重于田去軍俾墨繯從事而後
兩月賊平殊恨不及公也公性莊寡色笑故舊雍
雍如也童僕訢訢如也唯謹至為德于親黨如恐
不及貧而受廛與受衣食者相屬而察族子之材
不材調給之或食賈或食力人人各意得不言人
過居恒念耳可聞口不可言又戒殆辱之耻言人
滿則天概之不爽所寄于田家書悉可與人觀斯
不慚衮影君子哉春秋六十有九配吳夫人父即

所授經吳公者太學生夫人與公共輓鹿門鮑冀
野賓客終始如一日世稱駢德欲美至是從于田
官卒于濟寧郎中公之卒 天子念功臣賜祭葬
有加遽謂之希有二子皆夫人出長雲龍太學生
先公一年卒娶邢氏繼孫氏王氏于田其次名化
龍以都察院右都御史兼兵工右侍郎先總督川
貴湖廣軍務後總督河道今留少保兵部尚書娶
王氏女二唐志雅張一驥其壻皆鎮撫孫男四不
矜聘御史崔君邦亮女不伐聘崔景福女不溢聘

某女俱雲龍出不矜為于田後而于田復舉子不
盈聘通叅王君永光女孫女六所字為秦兆琳田
景新王統成其杰崔胤茂統即通叅子胤茂崔御
史景榮子其杰鎮撫一未字俱化龍出墓在城南
魏村之原合葬焉銘曰仙李之遺瀨鄉隴西有喬
一枝茂篤之祐孕此叔虎既文且武曰孕惟何白
首不磨雙壁孔嘉文武奚若稟其庭約靡試不爍
威行東鄙群旃嚙指毋飲蒲水西氛匿日徃夷其
窟銅標屹碑支祈四走繫如羊狗漕駛萬艘疇教

之忠疇尸之饗惟鹿門風挈三大事於臣無二累
葉之締參鼎典旅閼閱其府以耀先祖二老之歸
帝聞曰噫加籙斯宜言美之櫟言鬣之馬屬將作
者在城鬱佳九命之家麟數鳳阿我鏤其石而標
世德有萬無極

朝列大夫山東布政使司左叅議陽谷南公
墓碑

南公卒明年子太史師仲以王太史圖狀來請表
余雅嚮公而公仲子余所進士今太史又有一日

知夫何能讓公諱軒字叔後陽谷其別稱也故籍
河東徙蒲城其再徙渭南也自公五世祖安義而
贈郎中金為資縣學博則南始興贈公有二子長
大吉正德辛未進士守紹興府次逢吉嘉靖戊戌
進士山西按察副使此關以西所稱二南者觀察
公配李恭人誕公有英骨年七歲從觀察公南游
講德王文成之門稍長力學汎濫詩賦古文辭補
博士弟子同舍生毋敢與均席丁酉舉於鄉癸丑
成進士讀中秘書隨以母喪歸服闋授比部郎為

諸公所器改銓部三年最封父母及配裴安人先是觀察公以備兵代北中前守保寧時蜚語罷公上書願得推恩用原官致仕而贈母太夫人天子哀憐其意特許之因著為令晉考功員外郎值大計攝郎中時分宜為政而夏子開者其姻婭也為太守沓而貪公斥之以其故見銜守司勲郎數年不調徐文貞秉國始典選稍行其志以太宰某復脩郤族言者中之調為南考功公既位直齷齪不可朝著間又念觀察公年高請終養不報甲子分

校秋闈得名士若而人尋晉四川憲副所治當邨
置軍伍持大體而已不毛舉土司黃中負固于支
羅扞邊吏公以兩臺檄勘治之奉疆索旋攝學政
蜀人士大悅而前太宰之黨尚不醒左公官遂棄
而歸侍浣滌厠踰暇引帷中弟子誦詩說書詠先
王之風樂也如是六年而今 天子御極起知壽
州五月倅廣平僉憲四川分巡川以南川南酋多
不法公操三尺御之伏不敢動亾何懼觀察公喪
服闋待除而王少宰挾氣醖恫薦紳銓曹釀飲公

岼然據上坐不讓王以為嘽漫之曰公前輩固應
爾公曰我前輩誰能為後輩一坐動容復補蜀憲
晉山東左叅議護東兗而少宰黨亦不驪詆公老
公時才六十不應老既再躋弗究而夙聞東越之
風以道自樂天性孝爰繼母王夫人嚴奉之無違
色太守公捐館公悉經紀之而教其三子若孫今
選郎企仲成名觀察公有遺產取其瘠而推其腴
於兩弟同胞妹早亡一女呱呱泣公命裴安人育
之擇名家字之內行至純備也而赴義常若弗及

乙卯地震邑令殞群不逞之徒誣而公糾士擒首
事者殲焉邑恃以安歲祲輸粟助賑又為義倉贍
族人劉主事有才名卒而其妻任安人抱共姜之
節公白當道旌之且梓劉遺草傳焉祭酒王公塲
笥中文為人所匿公力搜之編以行其不以生死
侵然諾如此文法西漢詩法漢魏盛唐書法章顏
所著有渭上稿續稿關中文獻志訂正通鑑前編
渭南志南氏族譜蓋優游林下二十年日以圖史
自娛而不問家人產神明之用不衰及聞太史解

館大喜賦遠期編命酒酣歌歌竟就榻若委琬然
萬曆丁酉八月二十有二日也年八十有一配裴
安人子四長學仲辛酉舉人懷慶府通判娶田氏
繼張氏次憲仲余甲戌舉者棗強知縣卒娶左叅
議熙女繼牛員外恒女次師仲即太史檢討娶即
王祭酒維禎女繼左氏次仰仲邑諸生卒娶郭訓
導珠女繼東氏女子四娥適田守廕嫺未字亾嬪
適指揮僉事孟辨孔兵部侍郎重子珩即所育亾
妹女適御史楊光訓封安人孫居益居恒居益舉

辛卯鄉試銘曰惟南稱望今關中博士講座開其
宗太守觀察雙人龍左叅紹驤滋益豐玄莛朱蹕
海內從冠裳時論城南同廼公之學本越東博碩
以蓄才復雄有如玉匣流彩虹神物駭世宜難逢
身以大耄名德終為鄉祭酒開群蒙學者誦義垂
無窮用不究年何悲翁古之君子奚必躬往往寄
之蘭蕙叢太史宛然乃父風石渠簪橐雲霞重余
勒珉詞賁玄宮於千萬年齊華嵩

中憲大夫山東按察司副使雲浦黃公神道

碑

嗚呼是一貫座主雲浦黃公墓公諱澄字元登嘉
靖丁未進士官山東按察司副使壽八十有二蜀
金川人自上世宋文節公庭堅居豫章三徙至此
始徙曰庚七公生必高必高生封戶部郎中林林
生知開封府璿璿生斗斗生封慶陽知府誥卿慶
陽公配朱恭人生公公多奇弱冠通易詩春秋取
第授彰德府推官治鄭王獄有疆項稱入為戶部
郎初入時人擬且異選而徙得部者以忤分宜故

為郎又忤咸寧以不能徇其攘客兵餉為橐中裝
故監兌江西道袁州有擢金者繩以法又分宜奴
也還京遇分宜子于塗復不避以此叢諸怨既循
資僉陝西事三年而猶用京察落職倅同州初公
理彰為庚戌虜薄都城奉詔練郡兵其僉陝也駐
花馬池增萬雉以禦虜搜故壘得戰車三百肄之
復鑿井三百便戍守虜一入大殲之當事者知公
不獨有文事有武備而竟以顧內郤莫登剡夫公
不難以身抗權貴而世乃難以公抗權貴經綢失

候胡望于蒼隼哉在洞州嘗署蒲蒲治稍遷貳湖
州府署武康歸安又治當世之遷客盡不事事而
公獨勤不虛取直於官下若此會毋喪歸不欲出
慶陽公強而出補河間遂守慶陽成滿秩之封遷
山東按察司副使直治河過家復不行慶陽公曰
人言黃家仕宦咸老二千石信乎蓋公曾祖璿伯
祖某皆終典郡而慶陽不欲信是言也會總河遣
人迎不得已之官治魚臺渠九十里費所估才什
一而亟成撫臺翁公大器公而總河顧大忌以為

形已於是惟外艱而時宰之不知公者與愚者比
而免公公聞之笑曰吾祿逮親矣何憾自是與人
世絕耽中聖而間從交游論天下事雖片言鑿鑿
中機窺蜀君子之善政事也所從來矣好養生祀
玄元七十舉丈夫子八十而貌猶童也公理彰倅
同貳湖守慶陽皆預選士而不佞一貫則公貳湖
時所舉方撤簾遽聞奸不佞偕同門友拜于次逮
不佞立朝而公歸蜀蜀去長安萬里徒從牋記起
居神理相往來嗚呼不謂今茲而神理盡悲夫憶

不佞始計偕為嘉靖壬戌覲長安跬步非錢不行
不狂飲不稱意氣交而余皆病之則自謂終此生
不可官連不錄於南宮不戚也其後流俗稍改簠
簋頗飭而作氣勢者有加士官斯世而欲以廉槩
大節通行難矣余又見仕宦不得志者其墓文未
嘗不譏時宰時宰不能重人生而重人死今之宰
誰也寧不念天下上大夫有廉槩大節如公而終
沉淪老死不見用者乎余是以惴惴靳退躬公已
亥逝而子驥馳狀來又三年而余始獲表公誠有

所不忍也公配甘恭人與公同德同壽同葬而子
師表為麗江府丞者恭人出次夢驥夢葵側室錢
出夢弼側室王出驥廩生弼公七十時舉者公卒
時有孫六人曾孫四人詳李宗伯誌中銘曰峻矣
黃公家法洽覽六官之事悉任而敢不撓權嬖終
焉壞坎檄以為親卷懷莫忝所舉作銘揭之後覽
所徵在茲匪其私感

劉晉川少宰祖贈公墓碑

始與余讀書中秘者晉山陰王公沁水劉公王公

大拜劉公歷給事中為少宰少宰嘗秉鉞北門

上嘉其保釐功贈大父如少宰官大妣泮人既拜

寵靈將樹碑于隧而以文請余公諱得保字善固

世沁人曾大父浩初大父載父文住母趙氏生而

食貧力穡自給稍充去而賈行鹽鐵江淮間與從

兄善復偕近三倍當分恣兄之所欲以百金讓喜

貸予不償亦不問曰人當蹇時為生難此吾之所

嘗也一僕雖椎愚終不易嘗見牽童牛入屠市者

心動問直幾何而買之後孳十倍居益饒患徭不

休使其子賓椽椽無害既而冠帶拜堂下喜曰田
舍翁得此快矣年六十不復游第結社誦書時時
群里中子評薦之又嘗言燬惡之報不於其身必
於其子孫天網不恢也聽者悚然邑程侯聞請為
鄉祭酒辭曰吾起田更老于賈敢與邑主分庭益
我盥不可又嘗語子弟曰吾入吳眼見華亭相公
髻耳已決科已督學已據台鼎為三公公卿種安
在盍奮諸是時少宰甫七歲以為奇口授之章句
十四而游于黌喜曰亢宗在此惜吾不及見慎毋

驕至今少宰誦其言遘疾時二子方他出而少宰
已約婚楊泚人籲曰即不起幸少須臾無死而需
子來就嘉禮乎公不食數日矣倏張目作聲曰吾
輒回觀娶婦賓亦至矣悉如言而後卒人以爲載
德之效夫梗杞鉏干雲霄垂蔭百畝扶荔之實沃
一鄉唯其本固故其蔭與沃久也如公者所爲植
劉氏本遠矣楊泚人者公配也純篤貞一慈仁樂
施事繼姑竇雖勞不怨拮据鉅細率作而前終其
身績紡不倦公生成化丙申卒嘉靖壬子享年七

十有七洲人生成化丁酉卒嘉靖丙寅享年九十
長子賓稅課大使三錫封為戶部員外郎浙江提
學副使吏部右侍郎娶牛氏封恭人贈淑人實壽
官娶韓氏孫三長即東星娶李氏封洲人次東銘
侯門教讀兩娶王氏次東啟增廣生娶李氏曾孫
男四公卒四十餘年而有今贈余詮次履迹勒之
貞砥使邦人知素封之來與天道會

中憲大夫都察院右僉都御史雷峰汪公墓

碑

中丞汪公雷峰先生既葬鳳舉之陽其孤謹矜幽
事具無憾蓋八十載矣孫禮約紹揚祖烈夙夜孜
孜於是又樹石于隧路屬余紀公之大以詔來者
公諱玉字汝成汪固魯成公子食采邑也後遂為
氏世居鄞之大雷山因自號雷峰封刑部公子材
配吳宜人以成化辛丑舉公公生而穎敏沉毅十
三補郡弟子員通性理諸書潛思默悟慨然以聖
賢自期辛酉登賢書戊辰成進士授刑部江西司
主事強執恭謹以其精志輔爰書而行絕不旁阿

時逆瑾專恣具獄稍逆指者輒中以法而獨不敢
中公尋轉員外郎陞湖廣僉臬備兵沅辰永順土
官恃富強侵保靖地權貴多為所餌至有為之左
右者公卒正以法先是永順持金貝賂公不行則
陰行刺手顫不能舉因歎曰神人也香爐山苗叛
公統湖貴二省兵討平之上賜金幣嘗構書院
于沅之明山日聚生徒講誦士多興起已卯更巡
武黃會逆濠陷九江接壤黃州荆藩掌城門鑰禁
不啟吏民豕駢公沿流入城命啟閉如常惟練兵

增埤為捍圍計黃梅故饒粟公曰此齎盜糧也取
歸黃於是逆濠氣奪而境內寧戢矣故論禦寇功
公為最然弗屑貽韋取容積勤六年薦剡不及直
指毛伯溫特疏公才節擢副臬備彬桂兵土賊王
廷鑑為梗率民兵殲之竟不以功聞癸未以外艱
去既免喪補臨清裁費省役孔道幾清丁亥陞山
東按察使尋陞都察院右僉都御史巡撫順天公
以邊備久弛疏請別賢否明賞罰以示勸戒論罷
尤不法者二人邊將有某者伺公衣羊裘以貂裘

進公亦不鄙明年返之曰已藉禦寒矣然未嘗一日服也其介廉若是畿內賊楊恭倡亂公以方略授叅將郝通折其首餘黨悉平上嘉公功特賜金幣當是時廟堂方嚮用公公亦極計所以慎固維之畫亾何病消渴再疏乞休不允竟不起矣時正德己丑十一月十九日也享年僅四十有九上聞之嗟悼賜祭公姿儀奇偉性質剛毅生平學問得力于克己嘗有詩云過當貳處根猶在怒未遷時火始然三十年来都不是九泉無地起顏淵

慎交與所與游獨陽明先生令天永其年道德功
業何遽遜哉先生亦云汪公當今顏子也所著有
二書粹義書經存疑錄撫畿奏稿雜記敝篋留稿
配陳氏封安人嘗戒子曰我死但志姓氏生卒不
可置辭婦人無善也稱兩賢矣公子長曰墀無後
次曰坦坦子即禮約大雅淹博為汪聞孫其辭曰
有偉詰人川嶽孕珍固完元藏愷臬並臻遵質而
履淵塞胡夢執憲不回初服疇祉誰盤世根道以
律伸誰奸皇度略與時存伐蠹剪蠹廓我天路大

府式規泰社永祚爾衡獨盱作衛奏膚夙夜究圖
亶也碩儒帝眷斯薦臣悃無幅中蹶脩途逝不
返躅悼徃若驚知命則寧涉聖有程作後范型碩
人占吉令終克一有特斯表其明如日維日之崇
嫿儀與風無石不豐永曜幽宮

倪處士暨配節婦徐氏合葬碣

萬曆壬寅 皇太子正位東宮 詔天下表揚貞
節凡民間守志孤嫠即不能盡舉而所在撫按官
下有司類褒之以推廣 上恩于是里中倪處士

配徐氏與焉處士名鏞字天寧本右族善良為衆
所推娶徐氏生男二長順卿次理卿處士卒時理
卿在襁褓而家貧甚外侮日至孺人指天矢植孤
艱辛萬狀力績紡為生計已授室鞠諸孫順卿生
元佐元俊元傑元仁元化而理卿生元輔擇其儁
者授以經元佐元輔相繼為邑庠生駸駸乎繁昌
云蓋孺人以貞烈報所天而竟獲表揚殊寵則
天之報既渥矣處士生某年月日卒某年月日享
年四十有九孺人生某年月日卒某年月日享年

八十有三距處士五十餘載而歿歿又六載未葬而順卿逝理卿獨涕泣營卜乂之或告曰清道鄉王崗原君所自置田也是吉可葬理卿忻然從之于今歲九月二十五日襄事焉蒐其永慰矣余廼信世有砥節敦倫者雖微必章雖乂不泯蓋如此識其處曰是為明故倪處士天寧甫暨節婦徐氏之墓